

Tasiilami Tunumiunut tamanut atorneqartussamik Qaqiffimmik
pilersitsisoqarnissaanik Naalakkersuisut suliniuteqaqqullugit Inatsisartut
aalajangiffigisassaattut siunnersuut

(Inatsisartunut ilaasortaq Aleqa Hammond, Siumut)

Akissuteqaat

(Peqqissutsimut Naalakkersuisoq, Agathe Fontain)

Siullermeerneqarnera

Naalakkersuisut siunnersuummut qujapput.

Imigassamik pinngitsuuisinnaannginnermut katsorsaaneq suliassaavoq Peqqinnissaqarfiup ataani inissisimasoq. Suliassaq taanna kivissinnaajumallugu katsorsaanerup ingerlannissaa pillugu Peqqinnissaqarfiup Frederiksbergcenteret isumaqatigiissuteqarfigisimavaa, tamannalu maanna inini Peqqinnissaqarfiup atukkiussimasaani ingerlanneqarpoq. Taanna taaguuteqarpoq Qaqiffik.

Aaqqissuussaanermik ataatsimiititaliap pisortat ingerlatsiviisa aaqqissuunneqarnerisa iluarsartuuteqqinneqarnerat pillugu isumaliutissiisummini 2005-imeersumi kaammattuutigaa imigassamik pinngitsuuisinnaannginnermut katsorsaasarneq kommuninut nuunneqassasoq. Naalakkersuisut KANUKOKA-lu isummersimapput kaammattuut malinniarlugu.

Aaqqissuussaanermik ataatsimiititaliap kaammattuutaa naapertorlugu imigassanut tunngasut 1. januar 2009-miit nuunneqarnissaat pillugu 2008-mi KANUKOKA suleqatigineqalerpoq. Nuussinissamulli piffissaliussaagaluaq aalajangersimasumut piffissalernagu kinguartinneqarpoq nuussinissamillu suliaq unitsinneqarluni, nuussinissamut tunngatillugu KANUKOKA arlalinnik piumasaqaateqarmat imaaliallaannaq naammassineqarsinnaanngitsunik.

2009-mi pineqartumik nuussinissaq pillugu oqaloqatigiinnerit nutaat Peqqissutsimut Naalakkersuisoqarfiup KANUKOKA-llu akornanni aallartinneqarput. Oqaloqatigiinnerit suli ingerlapput.

Peqqissutsimut Naalakkersuisoqarfiup pilersaarutigaa oqaloqatigiinnernut atatillugu imigassamik pinngitsuuisinnaannginnermut katsorsaasarneq pillugu augustip qaammataani ulluni marlunni sammisaqartitsiniarluni KANUKOKA-p, kommunini borgmesterit

atorfilittallu peqataaffigisaannik. Ulluni sammisaqarfiusuni nunatsinni imigassamut tunngasut siunissami aaqqissorneqarnissaannut periusiusinnaasut oqallisigineqassapput, tamatumunnga ilanngullugu kommunit kissaatigisaattut katsorsaasernerup avatangiisini qanigisani ingerlanneqartarsinnaanera, ilaatigut katsorsartinneqartut utersaartut pilertortumik katsorsarteqqilersinnaasaqqullugit.

Ulluni sammisaqarfiusuni siunertarineqarpoq KANUKOKA-p, kommunini borgmesterit atorfilittallu akornanni ataatsimoorluni oqaloqatigiinnissaq, taamalu imigassamut tunngasut kommuninut nuunneqarnissaanni suleqqinnissamut ataatsimoortumik aallaaveqartitsilerluni.

Peqqissutsimut Naalackersuisoqarfiup naatsorsuutigaa ulluni sammisaqarfiusuni ullut taakku KANUKOKA-mit, kommuninit Peqqissutsimullu Naalackersuisoqarfimmit peqataaffigineqartumik suleqatigiissitaliornissamut aallaavigineqassasut, taakkulu ataatsimoorlutik oqallisissiorsinnaassapput imigassamut tunngasunik kommuninut nuussiniarnermi atugassarititaasut sinaakkutissallu pillugit.

Qaqiffik Peqqinnissaqarfiup Frederiksbergcenterillu akornanni suleqatigiinnissamut isumaqatigiissummik tunngaveqarmat aalajangiiffigisassatut siunnersuutip imigassamik pinngitsuuisinnaannginnermut katsorsaanermut tunngasuni siunissami periarfissanut killilersimaartitsinissaa Naalackersuisunit isigineqarpoq.

Naalackersuisut kissaatiginngilaat imigassamut tunngasut tunniunneqarnissaat pillugu KANUKOKA-p aamma Peqqissutsimut Naalackersuisoqarfiup akornanni oqaloqatigiinnerit maanna ingerlanneqartut killilersimaartinneqarnissaat, imigassamik pinngitsuuisinnaannginnermut siunissami katsorsaasarnissaq pillugu oqallinnerit sulii ingerlanneqartillugit.

Naalackersuisut inassutigaat aalajangiiffigisassatut siunnersuut maannakkutut isikkoqartillugu itigartinneqassasooq. Naalackersuisut siunnersuuteqartoq naapigiarniarpaat KANUKOKA-p aamma Peqqissutsimut Naalackersuisoqarfiup akornanni imigassamik pinngitsuuisinnaannginnermut siunissami katsorsaasarnissaq pillugu oqaloqatigiinnernut imigassamik pinngitsuuisinnaannginnermut katsorsaavimmik najukkami pilersitsisinnaanermut periarfissat tunngavissallu ilanngunnerisigut.